



# Skitsofrenia

## Realidat perturbá

Tur hende konosé momentu ku e ta kere ku e ta tende un stèm, turesten niun hende no a yam'é. Òf ta kere ku e ta mira un hende pará den sombra, pa despues realisá ku ta un palu. Pero tin hende ta tende stèm i mira kos ku no t'ei pa otro hende, turesten pa nan e kosnan aki ta eksistí realmente. Otro ta konvensí ku tin hende ta persiguí nan òf ta kere 100 porshentu ku nan ta brùit di Kristu. Den un estado asina, e hendenan aki ta bisa kos ku ta completamente inkomprensibel pa un otro hende. Nan ta hasi un impreshon bruá i nan ta realmente bruá; nan kontakto ku realidat ta seriamente perturbá. Hende den un estado asina ta den un estado di *sikósis*. Hende den un estado di sikósis por sufri di *skitsofrenia*.

### Un problema di salú hopi frekuente

Skitsofrenia no ta un raridat. Mundialmente 1 den 100 hende kualke dia den nan bida ta haña skitsofrenia. E malesa generalmente ta bin na kla entre 16 pa 30 aña. E síntomanan ta varia di persona pa persona. Skitsofrenia ta bin dilanti mes tantu serka hende hòmer ku serka hende muhé, pero ta afektá hende hòmer na edat promedio mas hóben.

***Skitsofrenia ta toka hopi hende. No ta algu di tin bèrgwensa di dje òf di skonde.***

Bo ta rekonosé bo mes òf un hende rondó di bo den e deskripsjon aki riba duná òf den e síntomanan na otro banda di e karchi aki?  
Tuma kontakto ku bo dòkter di kas. E por referí bo na un profeshonal riba tereno di salú mental.



Klinika Capriles  
Algemeen Psychiatrisch Ziekenhuis

*Klinika Capriles ta forma parti di*



## Sikosis òf skitsofrenia?

No ta tur hende ku ta pasa den un sikosis tin skitsofrenia. Un sikosis por surgi tambe despues di un temporada difísil i sofokante den un hende su bida, òf por ta konsekuensha di uso di droga òf un depreshon. Ta papia di skitsofrenia ora un hende pasa den un sikosis largu òf vários sikosis i no ta funshoná bon den e periodonan entre e sikosisnan. Ora ta papia di skitsofrenia, ta yama e fenómeno nan ku ta pertenesé na un sikosis e *síntomanan positivo* di skitsofrenia: nan ta klaramente presente. E fenómeno nan di bahada di funshonamentu *yama e síntomanan negativo* di skitsofrenia: sierto abilidad òf karakteristiká ta ousente.

### Síntomanan positivo di skitsofrenia: e sikosis

Durante un sikosis, hendenan ta hasi un impreshon straño riba nan ambiente. Nan ta hasi i bisa kos sin pia sin kabes. Ta parse manera nan sintimentunan no ta kuadra ku loke ta pasa rondó di nan. Por ehèmpel, nan por grita hari òf yora sin un motibu kla. Esaki ta bin pasobra un hende den un sikosis ta biba den un propio realidat.

### Kreensha

Kreensha ta konvikshon òf pensamentu ku no ta kuadra ku realidat i den kual e persona ku e imaginashon mes ta e sentro. Kon sin rason òf improbabel ku nan ke ta, e persona ta keda tene na e pensamentunan aki.

### Halusinashon

Hende ku ta halusiná ta tende, mira, sinti òf holer kos ku solamente pa nan ta realidat. Tende stèm ta pasa mas frekuente. Tin hende e stèmnan ta duna komentario riba tur kos òf konseho, tin otro e stèmnan aki ta duna enkargonan (peligroso). Den algun kaso, hendenan ta sinti tur sorto di kos na òf den nan kurpa.

### Pensamentu bruá

Den un sikosis pensamentu ta bai muchu lihé, muchu poko poko òf e ta bai kaótiko. E pensamentunan ta inkoherente i difísil pa kontrolá. E persona sikótiko ta bai papia i reashoná di otro manera i tin difikultat pa komprondé otro hende.

### Síntomanan negativo di skitsofrenia

Hende ku skitsofrenia ta funshoná sosialmente i sikikamente ménos bon den e periodo entre e sikosisnan. Ta parse manera nan tin poko energia i nan ta demostrá tiki emoshon.

Nan ta deskuidá nan mes, nan trabou i nan kontaktonan sosial. Pa nan ambiente nan ta difísil pa aserká, i no ta semper nan ta komprondé situashonnan sosial i señalnan mes un bon. Nan ta sinti nan mes bashí i deprimí. Nan no por konsentrá bon i difísilmente por tuma desishon .